





衡岳志卷之七

分巡上湖南道僉事東莞鄧雲霄

編輯

衡州府知府長泰楊鍾英

衡陽縣知縣清江羅夢暘

衡山縣知縣汜水何登高同訂

鄉紳禮部郎中耒陽曾鳳儀輯纂

衡州府學生貢王邊寧

衡陽縣學生貢王國泰

劉經筵

臨武縣學生貢鄺祖詩



衡岳志 卷之六 郴州 學生負素伯璣同校

詩類

自昔騷人墨客事幽栖窮遐矚莫不形之歌咏以  
抒寫性靈蓋一種清高之氣不與烟霞泉石期而  
痼癖膏肓已中之不可解不第月露風華流連景  
光而已衡岳震旦名區高賢錯趾相望山靈即欲  
秘之不可得諸所為詩歌皆乞緣山靈而還借為  
山靈重者也凡六朝而下詳錄之近代有未盡錄  
者俟徐採入

四言古詩

國朝

祀岳歌三章

管大勳

其一

維岳巖巖總齊南荒宅土阜氓厥威孔彰於皇秩祀  
爰肇虞黃碧壇崇崇璇宮煌煌廣廷肅謁禮文煥將  
戒而有司薦而烝嘗豈曰明德以馨以香朱旒翩翩  
赤靈洋洋鸞輿至止有赫其光

其二

猗與那與鞀鼓逢逢噦噦管簫維樂融融珪璧斯奠



玄纁載供瑩兮純兮表予之衷既滌我牲既昭我恭  
於豆于登靡物不豐薄言酌之曷報之功載觴載獻  
思齊雍容陟降不遐篤祐攸同惠施蒸黎祈匪在躬  
其三  
禮嚴醴假厥終匪懈受釐元禎於昭未艾六龍飛駕  
五雲騰蓋神飈若馳迴翔天外秀巒嶺嶺靈泉濺濺  
億萬斯年埒于嵩岱綏此南服永錫豐泰

五言古詩

魏

登南岳

劉楨

文鳳集南岳徘徊孤竹根於心有不厭奮志凌紫氛  
豈不常辛苦羞與黃雀群何時當來儀將順聖明君

晉

望衡岳

庾闡

北眺衡山首南睨五嶺末寂坐挹虛恬運目情四豁  
翔翮凌九霄陸鱗困濡沫既體江湖幽安識南溟濶  
宋



巖下

謝靈運

衡山採藥人路迷糧亦絕過息岩下坐正見相對說  
一老四五少仙隱不可別其書非世教其人必賢哲  
唐

晚泊衡湘

宋之問

五嶺栖遑客三湘鷓鴣顏况復秋雨霽表裏見衡山  
路逐江南轉心依雁北還唯余望鄉淚更染竹成班  
送女道士褚三清遊南岳 李白

吳江女道士頭戴蓮花巾霓衣不濕雨特異陽臺神  
足下遠遊履凌波生素塵倦尋向南岳應見魏夫人

贈衡岳僧方外

前人

衡山有開士五峰秀真骨見君萬里心海水照秋月  
大臣南溟去問道皆請謁洒以甘露言清涼潤肌髮  
湖海落天鏡香閣凌銀闕登眺餐惠風新花期啓發  
遊南岳過漢陽別浮屠談皓 前人

秦欺趙氏璧却入邯鄲宮本是楚家玉還來荆山中  
丹彩瀉滄溟清輝凌白虹青蠅一相點流落此時同  
卓絕道門秀談玄乃支公延蘿結幽居剪竹繞芳叢  
涼花拂戶牖天籟鳴虛空憶我初來時蒲萄開景風  
今茲大火落秋葉黃梧桐水色憂沅湘長沙去何窮



衡岳志 卷之七  
寄書訪衡岳但與南飛鴻

望岳

杜甫

南岳配朱鳥秩禮自百王歛吸領地靈鴻洞半炎方  
邦家因祀典在德非馨香巡狩何寂寥有虞今則亡  
洎吾隘世網行邁越瀟湘渴日絕壁出漾舟清光旁  
祝融五峰尊峰峰次低昂紫蓋獨不朝爭長蝶相望  
恭聞魏夫人群仙挾翱翔有時五峰氣散落如飛霜  
牽迫限修途未暇杖崇岡歸來覲命駕沐浴休玉堂  
三嘆問府主曷以贊我皇牲璧忍衰俗神其思降祥  
題辛道士衡岳房 儲光羲

全神不言命所尚道家流迨此遠商楚遂令思北遊  
先生秀衡岳玉立居玄丘門帶江山靜房隨瑤草幽  
逍遙三花發罔象五雲浮自有太清紀曾垂草髮憂  
大年方橐籥小智卽蜉蝣七日赤龍至莫令余獨留

南岳

劉禹錫

東南地益卑維岳資柱石前當祝融居上拂朱鳥翮  
青冥結精氣磅礴宣地脉還聞膚寸陰能致彌天澤  
石鼓合江館 柳宗元

九疑濬傾莽臨源委濛迴會合屬空曠泓澄停風雷  
高館軒霞表危樓凌山隈茲辰始澄霽織雲盡褰開



天秋日正中水碧無塵埃  
宵宵漁父吟叫叫羈鴻哀  
境勝豈不豫慮分固難裁  
升高欲自舒彌使遠念來

合江亭

韓愈

江亭枕湘江蒸水會其左  
瞰臨眇空濶綠淨不可唾  
惟昔經營初邦君實王佐  
剪林遷神祠買地費家貨  
梁棟宏可愛結構麗匪過  
伊人去軒騰茲宇遂頽挫  
老郎來何暮高唱久乃和  
樹蘭盈九畹栽竹逾萬箇  
長綆汲滄溟幽蹊下坎坳  
波濤夜俯聽雲樹朝對卧  
初如遺宦情終乃最鄙課  
人生誠無幾事往悲豈那  
蕭條縣歲時契濶繼庸懦  
勝事復誰論醜聲日已播

中丞黜凶邪天子憫窮餓  
君侯至之初閭里自相賀  
淹滯樂閑曠勤苦勸慵惰  
爲予掃塵階命樂醉衆坐  
窮秋感平分新月憐半破  
願書巖上石勿使塵泥凝

岳竹

陳伯玉

鍾龍生南岳孤翠鬱亭亭  
峰嶺上崇翠烟雨下冥冥  
夜聞鼯鼠叫晝聒泉壑聲  
春風正淡蕩白露已清泠  
哀響激金奏密色滋玉英  
歲寒霜雪苦含彩獨青青  
豈不厭凝冽羞比春木榮  
春木有榮歇此節無凋零  
始願與金石終古保堅貞  
不意伶倫子吹之學鳳鳴  
遂偶雲和師張樂近天庭  
妙曲方千變簫韶亦九成



信蒙彫琢美常願事仙靈驅馳翠虬駕伊鬱紫鸞笙  
結交羸臺女吟弄昇天行携手登白日遠遊戲赤城  
低昂玄鶴舞斷續彩雲生永隨衆仙去三年遊玉京

岳麓

李偉

江南得春早二月已可扇維舟就林樾杖策瞰危巘  
峰回岸容改路匝山腰轉尋幽得深徑稍適遂忘倦  
儒宮迥清肅環堵抱山院向來講道地遽爾經鬪戰  
斷荒出遺址構木聳層殿開門俎豆陳酒薄時再奠  
金聲絕遺響吾道僅一線巍冠敦朴在尚手不釋卷  
陳公早知道壯志鋼百鍊嗟予亦何幸謬接金閨彥

過眼無相親抱璞羞自獻徜徉趨聖域感慨清淚濺  
圓鑿受方枘初心本無辨強顏甘能穢忍辱徒唾面  
登堂坐未暖駒陰似過箭嗚然仰天呼物態從萬變  
黏枯蝸壳癡得雋蛇龍健歸來登吾舟長江淨如練  
宋

遊岳麓寺

張栻

遊觀不作難呼舟度清泚新晴宿潦淨群山摠如洗  
上方着危欄萬象見根抵寒泉自可斟况復雜餽醴  
高談下夕陽邂逅玄鑰啓中流發浩歌月色在波底

登上封

前人



我尋西園路徑上上封寺竹輿不畱行及此秋容霽  
 磴危霜葉滑林空山果墜崇蘭供清芬深壑遙幽吹  
 不知山益高但覺冷侵袂路回屹陰崖突兀聳蒼翠  
 故應祝融尊群峰拱而峙金碧雖在眼勇往詎容憇  
 絕頂極遐觀脚力聊一試昔遊冰雪中未盡登臨意  
 茲來天宇肅舉目淨纖翳遠邇無遁形高低同一視  
 永惟元化功清濁分萬類運行有機緘浩蕩見根抵  
 此理復何窮臨風但三喟

晨鍾動雷池望日

前人

浮氣列下陳天淨澄秋容朝暾何處起彷彿認微紅

須臾眩眾采閭闔開九重金鉉忽湧出晃蕩浮雙瞳  
 乾坤豁呈露群物光芒中誰知雷池景乃與日觀同  
 徒傾葵藿心再拜御時風

中夜祝融觀月

前人

披衣凜中夜起步祝融巔何許冰雪輪皎皎飛上天  
 清光正在手空明浩無邊群峰儼環列玉樹生瓊田  
 白雲起我旁兩腋風翩翩舉酒發浩歌萬籟為寂然  
 寄言平生友誦我山中篇

風雪未已決策登山

朱熹

披風躡臺宮看雨百常觀安知此山雲對面隔霄漢



群陰匝寰區密雪渺天畔峩峩雪中山心眼悽欲斷  
吾人愛奇賞遙發臨河嘆我知西寒極見現今當洋  
不須疑吾言第請視明日蠟屐得鴈行籃輿或魚貫

大雪馬上次韻

前人

僊人喬岳頂散髮吹參差喚我二三友集此西南垂  
列筵命洛公侑坐迎江妃導之十羽旄投以萬壁璣  
繽紛一何麗曉霽難具知衆真亦來翔恍覺卅霄低  
茫茫雲霧合一一瓊瑤安回首謝世人千載空相思  
五衰怯雄觀未敢探此奇短衣一匹馬幸甚得所隨  
天寒飲我酒酒罷賡君詩人生易南北復此知何時

國朝

憶南岳

楚憲王

衡岳高峩峩根盤幾百里危峰仰層霄巨岳奠南紀  
空中紫蓋亭雲外芙蓉峙我嘗欲神遊乘風振遐舉  
一覽洞庭秋瀟湘在眼底

嘉會堂

湛若水

二賢並世生於此際嘉會七日與朋來酬言固尚在  
我生何不辰獨立無朋輩憶昔陽明子相期將有待  
時勢倏變更至今有遺悔二賢祠下樹勿剪以勿欺  
毋使我心傷心傷重感慨



入岳登楊太學生讀書堂

前人

天風吹月桂飄飄襲我裳試問此何里荅云桐木岡  
見誌命僕且停車登陟桐岡堂滿庭松桂發善士本  
來香采花勿采枝采枝恐枝傷何以恐枝傷昔人所  
遺芳

卜築

前人

遙遙起天柱巍巍南臺下於茲結雲松以上我精舍  
芳隣接五峰神明見中夜諸子來端居無玩亦無捨  
小憇祝先堯率二寺

前人

祝先與堯率自合爲室間梵堂隱鍾磬一逕何繚紆

竹木夾徑幽山色遶前除一飯乞分米出門還踟躇

宿南臺寺

前人

秋高感搖落名山窮日登息徒憇南臺寺古風泠泠  
髯翁作人拜風伯送秋聲時序旣如此人當法天行

祝融峰

前人

我年躋八十強半懷衡山於茲愜所願誰能不爲歡  
霧行衣袂濕雲臥衿枕寒清高萬籟寂神明中夜存  
一聲聞天雞紅日躍海門

紫蓋峰

前人

誰能張紫蓋杳杳來空中雙雙逼人清對侍兩碧瞳



我來待高秋飄然御天風前驅二彩鳳乘予一蒼龍

又

前人

洞天三十六朱明對朱陵放脚開雲霞信手推天扃  
香爐曉烟散紫蓋中天擎群巘起石磴一水自泠泠  
揖謝朱陵君借予地一亭

玄明洞

前人

玄明於衡岳竒勝是初貢仙居對朱明陰陽互藏用  
玄明夏避暑朱明冬過凍寒燠各以時日月迭迎送  
時聞景陽鍾風吹過陰洞

岳麓憶朱張

王守仁

客行長沙道山川鬱稠繆西探指岳麓凌晨渡湘流  
踰岡復陟巘吊古還尋幽林壑有餘采昔賢此藏修  
我來寔仰止匪伊事盤遊衡雲開曉望洞野浮春洲  
懷我二三友伐木增離憂何當此來聚道誼日相求

又

前人

林間憇白石好風亦時來春陽熙百物欣然得予懷  
緬思兩夫子此地得徘徊當年靡童冠曠代登堂階  
高情詎今昔物色遺吾儕願謂二三子取瑟爲我諧  
我彈尔爲歌爾舞我與偕吾道有至樂富貴真浮埃  
若時乘大化勿愧點與回陟岡採松柏將以遺所思



勿採松栢枝兩賢昔所依緣峰踐臺石將以望所期  
勿踐臺上石兩賢昔所躋兩賢去邈矣我友何相違  
吾斯未能信役役空爾疲胡不此簪盍麗澤相遨嬉  
渴飲松下泉饑餐石上芝偃仰絕餘念遷客難久稽  
洞庭春浪濶浮雲隔九疑江洲滿芳草目極令人悲  
已矣從此去奚必茲山爲戀繫乃從欲安土維隨時  
晚聞異有得此外吾何知

雲開堂

嚴 嵩

寤寐名山遊茲夕山下宿虛館絕浮埃沉沉在幽谷  
曠隴星映除颯爽風動木耳目澹無營靜嘿寡所欲

院寂凝清香更長續明燭慚無昌黎誠晴晦安可卜  
明發戒僕夫願恣雲霞羈

又

前 人

夜聞臺端檄欲駐湘中船良遊匪夙約茲會豈天緣  
狂思忽如醒攬承不得眠紙牕露微月髮髯至我前  
紅日出東方曉山映澄鮮高吟振衣去期子層雲巔

荅甘泉遊岳

蔣 信

秋風飄雲裾採藥過衡麓繡袍天上使攬轡來何速  
一爲帝文曲皇皇宣化育一爲帝執法秉鉞鎮南陸  
盆負鐘鼎姿不數連城玉開筵列佳餚傾論侈前躅



朱輪故遲遲促席仍信宿近疎髮已短啜馨固所欲  
偶結山中懽渴襟豈應足

兜率峰

孫應鰲

孤界抗長暉爭緣愜幽甸路絕徑仍通流芳突舒顛  
山際萬木叢巖端一樓見豈不畏詰屈偶此脫浮戀  
華風起豐茸層嶺發葱蒨耳目信謠映物外復誰擅  
振衣千古豪歷落迴英盼

登南岳

王 偁

維舟湘水上始觀祝融峰何人尊炎服植此金芙蓉  
下窺俯南極仰攀接層穹昂昂五岳尊同立元氣中

陰時變氣候衆壑應寡同緣蘿石磊磊噴壑泉濛濛  
遙洒洞庭雪五月飛涼風伊昔禮明禋望秩猶三公  
靈湫出雲雨有禱無不通離明舞朱雀星紀專化工  
而我企冥漠覽眺殊未窮火黎記昔冢圯剝今無蹤  
營丘秘真圖孤魂竟誰從浮雲鳥道沒白日長天空  
惟應吊虞舜一嘯蒼梧東

虎肥泉

李攀龍

大士始結搆鑿空偏此丘二虎自南岳掉尾從師遊  
神威攫地脉佛力驅陽侯枯火迸石罅松根解綢繆  
勢寧決蹠去揮錫怒不休至今噴岩壑水猶咆哮流



酌言生壯心一嘯風颼颼海眼在其下潮汐故可求  
不然胡僧呪爭使波瀾浮穿壁吐長澗夾寺瀦龍湫  
疑作故山雨片雲駐岫嶺歸應出東林無為惠遠留  
方廣寺謁晦菴南軒祠柬諸同志

張居正

兩賢異鄉域千里還相求祇為戀徒侶能忘路阻修  
我行躡遺跡仰見祠屋幽高山近可仰嘉會亦綢繆  
俛首念疇昔戚戚懷殷憂雖抱遺俗心賦質暗且柔  
巖負喬岳有志力不適願我同心侶景行希令猷  
涓流匯滄海一簣成山丘欲騁萬里途中道安可留

各勉日新志毋貽白首羞

祝融峰

前人

祝融群峰表律萃萬古雄承虹掛丹壁邈若升蒼穹  
舉手捫太微天關洞開通璀璨南斗星垂珠當我胸  
俯瞰六合內洗滌烟雲重浩如太始初二氣涵冲融  
須臾湧陽景倒挂扶桑東瀛海不復辨三山安可窮  
寄謝冷風子吾將遊混濛

福昌寺

曾朝節 臨武人

筍輿方廣來崎嶇復古寺青林敞金刹焚香坐開士  
誰知第一義義亦本無二巖潭龍入聽初不在文字



送心空比丘歸衡山

郭正域

心空境不空彩筆畫虛空境空心不空生龜未脫筒  
心境若俱空海月映山風長安二月寒汝去雪漫漫  
梅子何時熟梨兒味正酸若到衡山上爲予問懶殘

白雲峰

紫栢生

小人松下飯味在天地先萬物澹吞吐一身白雲然  
卷舒於太虛蹤跡誰可便惟有搜寧者許隨黃菜禪

南岳廟

尹臺

疇昔抱微尚五岳志窺尋限身清切禁安得諧夙心  
恭承帝嘉命群藩展主琛炎方輿歷討因獲散冲襟

遂越三湘浦亦涉衡陽潯駕言謁靈后清齋秉嚴忱  
霾陰豁幽巘朝景耀陽林長松三十里夾澗搖疎森  
微颺度曲嶮蕭颯竿籟吟危閣聳霄漢朱碧徵霏陰  
群峰儼翔會紫翠紛升沉聖人握元化峙流序高深  
皇皇朱鳥祀秩禮崇古今惟德理南訛長養專調斟  
再拜眎庭廡肅穆懷居歆

登衡岳

王京

衡山自天落名勝真竒絕竭來恣幽賞相對忘言說  
天末起悲風商氣應秋節林鴉散夕陽藤蘿掛新月  
蒼梧渺何許湘靈鼓瑤瑟策杖扣禪扉柴荆蒙以密



慧燈照蒲團炯炯常不滅因之談衷愫聊以慰岑寂  
千古斯人心宇宙同空濶舜躋毫釐間所貴在區別

又

我來禮名岳山房聊信宿沉沉日復西猿鶴唵空谷  
商氣厲孤松金飈摧萬木幽栖絕點埃岑寂超無欲  
衣薄坐擁衾更寒寤秉燭勝遊足賞心誰問君平卜  
赤脚踏祝融乾坤不盈囑

流杯池

彭簪

吏事苦煩鬱索遊謝吾黨乘興出廓門四顧增慨慷  
荒亭久寂寥衢路成榛莽緩步陟崇岡高歌振林響

桃李咲無言春光正駘蕩飛瀑噴玉屑歧石擎仙掌  
分泉入曲池流杯恣清賞雜談忘爾汝一點動遐想  
斯湏非久計暫覺脫塵鞅憂樂古人心曷哉憑俯仰

望岳亭

王心

宿宿湘浦雲測測鴈峰雨美人遲不來寂寞誰爲語  
南風開翳陰賞心盼晴宇欣然見南岳廓哉忘羈旅  
七十二竒峰歷歷槩可數吾聞最上峰重華昔攸處  
祝融豈不高俯侍不敢侮遺廟多芝蘭芬芳冒下土  
緬想夔龍徒藹藹結纓組我欲往求之山靈恐吝與

燕坐有懷

張居正



炎州標靈岳歸然奠南極興雲翊帝工蔭風直斗域  
千秋儼廟貌祀典邦有秩我來叩幽秘躋雲屢登陟  
齋心肅永夜聆響如可卽髣髴邁真侶排空假羽翼  
授我玉拌藥光耀有五色瑤草吐雲英金書啓石室  
顧慙塵土軀恐負心所憶願言籍神庥精誠倘能格

懷昌黎文公

管大勳

聖賢久不作叔世崇佛老倬彼昌黎子力排著原道  
摘文振頽靡抗節秉孤矯寥寥百千年煌煌元和表  
寧逃 至尊怒頓爲迷俗曉慷慨辭金門赴謫潮陽  
島行行過南岳陰雲爲誰掃逆旅寄交權閑亭垂麗

藻瑱珉固不磨山斗以爲寶

懷晦菴先生

前人

吾道在南州考亭宗尼父正教行淳熙名言記石鼓  
崇臺幾廢興豐碑麗今古國步值艱難世俗多聾瞽  
獨以平生學抗論悟人主立朝跡已危乞祠心獨苦  
白鹿垂芳規岳麓存聖矩至今蒸湘間依然等鄒魯

懷南軒先生

前人

人心皆孔顏湛寂元無滓義利分毫芒誰能晰其旨  
緬仰懷先民蚤歲悟至理卓卓趨高明仡仡事踐履  
承家願不違許國死后已所以宋諸儒雅推南軒氏



足跡遍潭蒸師友契蘭芷勝遊霽岳雪涉趣詠沂水  
試讀武侯碑令人空仰止

夏日晚登合江亭

前人

青天火雲流落日山氣赭東湘漚西蒸輕風吹長夏  
歸然江閣懸磊石山其下高眺挹晴暉麗景誰能寫  
祝融莫炎維岫嶺巨原野豐林蔭千章瀟竹盈萬把  
啾啾回翔鳥瀏瀏奔谿瀉瀉流注溟渤披濤洞庭野  
猛然起振衣誰共濯足者江山環信美逍遙偶憇假  
誼囂既寂盪幽蘊自飛灑倚欄邀金鏡憑虛浮玉笋  
酒酣忘百慮歌成豈大雅遍扶亭中碑因知和者寡

宿雲開堂

管大猷

禮神夕方竟憇息巖東隅南星恍明滅北堂淨齋居  
百營既屏寂中夜常晏如寒禽鳴啾啾涼風吹徐徐  
移步廣庭下陡然發長吁明晨擬高眺重陰鬱未舒  
安得昌黎子為余曠清虛

登上封寺

前人

遵麓苦奔峭陟巘忘崎嶇薄遊散輕寒孤眺豁遠裔  
蒼雲飛東壁玉泉寫西嶼上方連空青下界視有無  
峰巒七十二茲山定中區平臺轉夷奧危棟還翼扶  
瞿曇肅金刹靈宮秘赤符遂令南岳尊永與乾坤俱



浩劫經代謝浮踪倦馳驅感時中常結覽景情獨愉  
目睇邇八埏心期隘天衢欽聖不在遠懷仙豈云誣  
明晨下山麓回首當追吁

祝融絕頂

前人

岳嶠本秀特板躋益嶮巖峰頭懸翼軫壑底蟠蛟螭  
松崖削青蓮石礪流綠漪赤玉縕重岡紅花散四垂  
香風起天末萬籟當空吹頓令六尺軀飄飄欲何之  
洞庭盈一掬蒼烟失九疑靈異杳焉對浩渺渾無涯  
遊舒清襟兼得探玄竒倦來臥白石飢將餐紫芝  
冥心戀景光延佇復多時翳塵自茲隔動靜還有期

終歸南山隱勞勞竟何爲

宿圓寧僧房

前人

昏黑造靈崖置身碧雲上禪房比且幽河漢宛相向  
入定孤燈懸回光見色相中逢老衲子種種說無量  
生涯度空林殿宇自開初莫識代幾更澹然有餘况  
啓宇理無生願言離孽障假寐對空王寤覺神怡覺  
疊疊發玄思了了達清曠偶聽山磬發攬衣驚逸響  
舉手別山靈明星曜孤嶂

遊南岳謁白沙甘泉二先生祠 李燾

海內惟五岳南岳當文明地脉盡南海靈秀鍾豪英



爰有白沙氏正學屬主盟寤寐朱陵勝犹懸物外情  
高第首文簡體認天理精九十登祝融祠爲白沙成  
迄今逾五紀几席儼師生媿余鄉後進廿載三之荆  
瞻仰思遺教隨處天則呈翠微含雪影春雲縱復橫  
野花叢將發谷鳥時一鳴際此歸羅浮無負紫芝榮

奉陪登岳

劉永基

祝融奠南服羅浮相與連七十有二峰崕岬羅膝前  
山川毓靈秀兼受多英賢大唐房杜後曲江人比肩  
有名動千古文彩耀當年我明白沙子夢寐祝融巔  
追隨舜禹跡檢點朱張編春戀高堂壽息遊江門邊

康成在門下是日湛甘泉九十餘康強朱陵訪列仙  
體認天然則安敢別宗傳尸祝禪梁父李公足後先  
隨處更精察好學勤勉旃諄諄教無倦言言皆真筌  
課業聞洙泗還風返葛天自從遭召文生民得晏眠  
清霜廉節冷三楚肅風烟駐節祝融上晴光草木鮮  
萬戶迎驩日春鶯亦喜遷俎豆光鄉哲承家弧矢懸  
河源銀漢潔派衍潤湘川

衡岳禱詠

張文光

放舟行湘中注目衡山上舟移景亦移千里各異狀  
奔峭湧逝波層巒開疊嶂疑塞忽開通一背復一向



魏峩插青冥幽深極遼曠林木色蒼蔚流泉瀉蕩漾  
猿猱嘯夜月豹虎浮雲抗他岳或奔圯茲山獨無恙  
鄴侯曾隱居旋拜真宰相高僧習禪觀屢得法眼藏  
興雲洩霧雨沛澤何儻宕舜廟可瞻依禹碑擬搜訪  
婚嫁了世緣岩栖託微尚

五言排律

北周梁

南岳道士步虛

庾信

渾成空教立元始正晷開赤玉靈文下朱陵真氣來  
中天九龍館倒景八風臺雲度弦歌响星移宮殿廻  
青衣上少室童子向蓬萊逍遙聞四會倏忽度三災

別友人衡

范雲

孤烟起新豐候鴈出雲中草低金城霧木下玉門風  
別君河初滿思君月屢空折桂衡山北摘蘭湘水東  
蘭摘心焉寄桂折意誰通



南岳九僊

前人

終朝吐祥霧薄晚孕奇烟洞澗生芝草重巖出醴泉  
中有懷真士被褐守冲玄石戶棲千秘金壇謁九僊  
乘鸞方履漢轡鶴且騰天

唐

自湘源至衡山

宋之問

浮湘汎迅湍逗浦凝遠盼漸見江勢濶行嗟水流慢  
赤崖雜雲霞綠竹緣溪澗向背群山轉應接良景晏  
沓嶂連夜猿平沙覆陽雁紛吾門闕客歸繞速已慣  
中道方泝洄遲念自茲撰賴忻衡陽美持以蠲憂患

南岳

賀朝清

湖北雨初晴湖南山盡見岳岳石帆影如得海風便  
山穴茅山峰彩雲時一現邀君共探此異籙殘幾卷

秋日南岳書懷

李白

北風吹海鴈南渡落寒聲感此瀟湘客淒其流浪情  
海懷結滄洲霞想遊赤城始探蓬壺事旋覺天地輕  
澹然吟高秋閑臥瞻太清蘿月掩空幕松霜結前楹  
滅見息群動獵微窮至精桃花有源水可以保吾生

入衡

杜甫

兵革自久遠興衰看帝王漢儀甚照耀胡馬何猖狂



老將一失律清邊主戰場君臣忍瑕垢河岳空金湯  
重鎮如割據輕權絕紀綱軍州體不一寬猛性所將  
嗟彼苦節士素柎圓鑿方寡妻從爲麗兀者安堵墻  
凋弊惜邦本哀矜存事常旌麾非其任府庫實過防  
恕已獨在此多憂增內傷偏裨限酒肉卒伍單衣裳  
元惡迷是似聚謀洩康莊竟流帳下血大降湖南殃  
烈火發中夜高烟燹上蒼至今分粟帛殺氣吹沅湘  
福善理顛倒明徵天奔芒銷魂避飛鏑累足穿豺狼  
隱忍相棘刺遷延抵疥瘡遠歸兒侍側猶乳女在旁  
久客幸脫免暮年慙激昂蕭條向水陸汨沒隨漁商

報主身已老入朝病見妨悠悠委薄俗鬱鬱回剛腸  
參錯走洲渚春容轉林篁片帆在柳岸通郭前衡陽  
華表雲鳥埤名園花草香旗亭壯邑屋烽櫓蟠城隍  
中有古刺史盛才冠巖廊扶顛待柱石獨坐飛風霜  
昨者問瓊樹高談隨羽觴無論再繾綣已是安蒼黃  
劇孟七國畏馬卿四賦良門闌蘇生在勇銳白起強  
問罪富形勢凱歌懸否臧氛埃期必掃蚊蚋焉能當  
橘井舊地宅仙山引舟航此行厭暑雨厥土聞清涼  
諸舅剖符近開緘書札光頻繁命屢及磊落字百行  
江摠外家養謝安乘興長下流匪珠玉擇木羞鸞凰



我師嵇叔夜世賢張子房柴荆寄樂土鵬路觀翱翔  
過南岳入洞庭湖 前人

洪波忽爭道岸轉異江湖鄂渚分雲樹衡山引舳艫  
翠牙穿藁粲碧節吐寒蒲病渴身何去春生力更無  
壤童犁雨雪漁屋架泥塗欹側風帆滿微冥水駟孤  
悠悠回赤壁浩浩畧蒼梧帝子留遺恨曹公屈壯圖  
聖朝光御極殘孽註艱虞才淑隨斯養名賢隱鍛鑪  
邵平元入漢張翰後歸吳莫怪啼痕數危檣逐夜烏

麓山法崇禪師故居

劉長卿

山僧候谷口石路掃莓苔深入泉源去遙從樹杪回

香隨青靄散鍾過白雲來野雪空王齋掩山風古殿開  
桂寒知自發松老問誰栽惆悵湘江上何人更渡盃

奉敕祭南岳詩

呂溫

皇家禮赤帝謬獲司風域致齋紫蓋下宿設祝融側  
鳴澗驚宵寐清猿遞時刻藻潔事夙興簪佩思盡飾  
危壇象岳趾秘殿翹羣翼登拜不遑飲酌獻皆累息  
贊道儀匪煩祝史詞甚直忽覺心魂悸如有精靈逼  
漠漠雲氣生森森杉栢黑風吹虛蕭韻露洗寒玉色  
寂寞有至公馨香在明德禮成謝邑吏駕言歸郡職  
憇桑訪蠶事遵疇課農力所願風雨時迴首瞻南極



酬于侍郎南岳見寄

包佶

桂嶺千崖斷湘流一派通  
長沙今賈傳東海舊于公  
章甫今殊俗離騷繼雅風  
金閨文作字玉匣氣成虹  
翰墨時無侶丹青夙在工  
主恩留左掖人望積南宮  
巧拙循名異浮沉顧位同  
九遷歸上略三已契愚衷  
責謝庭中吏悲寬塞上翁  
楚材欣有適燕石愧無功  
山曉重嵐外林春苦霧中  
雪花翻海鶴波影倒江楓  
去札頻逢信迴帆早挂空  
避賢方有日非敢愛微躬

祭南岳謁司馬道士

張九齡

將命祈靈岳迴策詣真士  
絕迹尋一逕異香聞數里  
分庭八桂樹肅客兩童子  
入室希把袖登床願啓齒  
誘我棄智訣迨茲長生理  
吸精反自然鍊藥求不死  
斯言眇霄漢顧予嬰紛滓  
相去九牛毛慙嘆知何已

自衡陽謁能禪師

司空曙

謫居竄炎壑孤帆祿不繫  
別家萬里餘流目三春際  
猿啼山館曉虹飲江臯  
霽湘岸竹泉幽衡峰石閣閉  
嶺嶂窮攀越風濤極沿濟  
吾師在衡陽欣此得躬詣  
洗慮賓空寂香焚結精誓  
願以有漏軀聿薰無生惠  
物用益冲曠心源日閑細  
伊我獲此途游道迴晚計  
宗師信捨法擯落文史菟  
坐禪羅浮中尋異南海裔



何辭禦魑魅自可乘炎癘迴首望舊鄉雲林浩虜赦  
不作離別苦歸期多年歲

國朝

宿普化寺飲章縣尹

湛若水

手持白羽扇頭戴碧綸巾眼希全岳色身帶羅浮雲  
藹藹賢明府遮道問殷勤恍惚平生知夙昔遊成均  
嘉筵就佛堂割雞雜衆珍鼓吹發碧落絃歌亦漸聞  
歡樂意未盡抗手別高旻

南岳

東愷

方輿維岳重南紀此山宗玉帛聞虞典匾書見禹功

太初分象界終古奠鴻濛夙夢曾飛月良緣偶采風  
聚星來舊雨攬轡有新驄嵐散孤屏出霞升瑞錦重  
石關疑虎豹松徑訝虬龍廟古儀仍肅芹香薦實恭  
小輿時引索危磴自支筇仙洞朱陵秘神峰紫蓋同  
開雲捫翼軫轉石起靈霤若木三山外扶桑一水東  
赤精傳寶籙碧鳳集朱桐漫掣鼇翻海閒招鶴下空  
洞湖聞廣樂梧野叫重瞳玉燭消氛稜瑤臺繞鬱葱  
登臨得無事留滯豈堪忡灑氣披塵想罡風怯病躬  
憇林春樹合歸路晚烟籠清嘯情方洽幽探意未窮  
種芝雲石煖接竹澗泉通且覓真如話休驚不若逢



衡岳志 卷之七  
天屏圍遠翠野火送暹紅松館方流月山尊正吸筒  
天吳何作惡酒聖未湏中遠宦悲韓子端居咲鄴翁  
功名看去鴈踪跡悵飛蓬擬作還南鎮因之望祝融  
擘龍離橘盞夢蟻破槐宮謝此周容態行當信所從

衡岳喜霽

黃佐

炎德殿南域玄功協北祗大哉祝融祀邈矣陶唐時  
錫民溥鴻澤翊國隆駿基明明翼軫列滔滔江漢  
馳屹柱立乾棟連終旦地維衣帶縈三湘嬰孺撫九  
疑攢峰鎖蒼霧標嵐橫綵霓青玉固葱蒨朱陵亦葳  
蕤茲山擅雄峻伊予嗜靈奇亭艦諧夙願飄節隨所

之仰探丹鳳穴俯見玄豹崖溟濛苦氛祲窈窕多路  
岐皎鏡雪方積虛壑風何悲豈知凌絕巘及此娛晴  
曦歛吸竭靈景混茫開太儀煙靄散林薄雲光溢川  
坻平厓少延佇窮髮皆可規振衣望郢甸披雲辨京  
圻譬彼朝陽鳥鼓爾梧樹枝整翮自茲去翱翔本無  
期

丘謙之自衡山來辱枉新詩并遺萬年三株衡

山石一片報謝

郭正域

五岳壯遊徧陽春大雅存紅顏謝冕黼白眼向琴尊  
紫袖朱絃動清歌玉露繁雄心付兩屐綵筆問三源



江漢風仍在岫嶺碣可捫玄夷迷曉夢寶洞駐征鞍  
練景飛雙鶴僊巖聞夜猿不知曾眺咏何以遂孤騫  
江介迴僊舫光風到華門三株披石秀一片動雲根  
麗藻來相訊瑤華不足論有懷擦杖履未暇效盤飧  
似接芙蓉面如聞金簡言憂思慙阮籍痛飲負平原  
意氣誰投轄文章已斲輪索居吾豈敢還擬賦高軒

登祝融

彭良臣

衡峰七十二縱目孰爲快直上祝融峰撐天無限界  
峻嶒莫遐荒尊嚴壓纖芥百越山如環九江流似塊  
翼軫星垂芒暘谷日輪曬隱隱耀神靈幽幽生奇怪

秩禮自前朝昭代更宿戒箇中色相忘眼底乾坤隘

午憩梵率

管大勳

下山頻入山異境非人間竹色千巖秀松陰一徑閑  
曲池流玉笋丹鼎駐朱顏佛殿浮煙裏空門流水灣  
登堂步虛寂躡磴拂爛班傑閣凌霄漢方亭闢草菅  
昔賢多卜築此地足躋扳與客同尋勝聞僧且閉關  
火燒三界易情洗六根難法爲因緣淨心從澹泊慳  
達生超上乘混迹落塵寰到處耽清隱何人悟大還  
樵柯爛白石旅髮憶青鬟酒熟寧辭醉詩成未可刪  
歸途風浙瀝出寺水潺湲



祝融峯

表子讓 柳陽人

七十二峯上崔嵬我獨尊炎方鎮熒惑赤后剖渾淪  
 太岳運兄弟群巒列子孫螭頭懸日月鰲足柱乾坤  
 霞落數賓鴈雲開見帝闈入天枕南極出地接西崑  
 雷伏池常合星懸夜可捫近谿迷俗路遠目見天根  
 嶠嶼多仙占樓臺半霧吞杲前先得曉杳後始知昏  
 陵下朱爲洞霄中紫抹痕山腰釀雨雪雲脚辨江村  
 石室無人到雲居遺世存登梯難住足俯檻易搖魂  
 春過風仍烈日高氣未溫芝靈作火照松老化虬躡  
 濯足濡湘水摩肩楫桂門緝花開不謝卅鳥拂還屯

分楚三鷄會環山萬馬奔中原下視小岷嶶不須論

石鼓書院詩

有引

溫陵劉春

郡北隅石鼓書院故諸先賢濂溪晦菴南軒  
 文定遊屐之地至於斯者未嘗不爲低回中  
 圯 鄧公鼎之推此意不可以興乎哉雖卒  
 卒缺於大雅之間又焉能已余亦賦二詩云

衡峯何崔崔石鼓伉其宅代疑周鼓同地留靈光跡  
 彼美群詰儒於焉敞遊鳥祁祁從諸生遜志禮鄒嶧  
 去之雖千歲所構有遺澤蒸湘四望合滔滔滿南國  
 精靈豈可晤神理詎寂寞我來吏茲土足以徵方策



紫陽固吾黨諸賢亦所繹仕優雖拙今離經良戀昔  
亮懷文翁意逝難恩程石

其二

方水驗靈傑青水徵教育道用倡爲尊地惟賞斯淑  
哲匠感廢興臨流廣新塾桂棟木蘭楣杏梁辛夷桷  
堦城系玫瑰牕櫺奕琳球灑衍互蒸湘蔚苑駿岳麓  
寓目何敞宏會心仍肅穆嗣美佇瀛閩振藻寧差玉  
素懷期作人涼德曠明牧鼓盪象草風切磨興淇澳  
斯言儻不昧德音良自勗

衡嶽擬古四首

南中尹 愉

衡山有靈鳥高潔鳳凰姿棲彼三花樹啄葉正紛披  
疑從海外來不與衆鳥嬉時聞一刷羽五色何參差  
飄然凌遠空虞羅焉所施

其二

朱明石洞側上有千樹松亭亭偃青蓋矯矯凌高峰  
白日亂翻波松子落崆嶺拾之誠可食不減茯苓功  
吾欲斲其根盤紆如蛇龍赤松曾憇此問之不相逢  
朝或過紫蓋暮或宿芙蓉白雲空悵望中道安所從

其三

石廩何竒絕中封不可開云是羽人糧積作白雲堆



玲瓏含象竅一一固青苔捫蘿踏其巔半天與徘徊  
燁燁多瑤草垂露滴崖隈更凌丹梯上清冷啜一盃

其四

絡絲潭底泉湛若白玉英誰為掛瓢者白日羽輪輕  
惠車今何在乘彼彩雲征時或過洞庭來聞鈞樂聲  
我欲往從之安得賦翰生聊為崖下飲冷冷肺肝清

五言律詩

隋

望日應趙王教

康孟

金烏升曉氣玉檻漾晨曦先泛扶桑海返照若華池  
洛浦全開鏡衡山半隱規相歡承愛景共惜寸陰移

唐

送薛天師往南岳

玄宗

洞府修真客衡陽念舊居將成金闕要願奉玉清書  
雲路三天近松溪萬籟虛猶期傳秘籙來往候僊輿

南岳尋道觀

王勃



衡岳志 卷之十  
枝屨光分野蓬闕盛規模碧壇清桂闕丹洞肅松樞  
玉笈三山記金箱五岳圖蒼虬不可得空望白雲衢

望南岳

吳筠

重波淪且直連山糾復紛鳥飛不復見風聲猶可聞  
朧朧樹裏月飄飄水上雲長安遠如此無緣得報君

水簾洞

李元輔

一片挂蒼崖分明不惹埃感成珠顆白垂下玉繩來  
野鷺飛難入山風捲不開聲聲去朝海無意戀巖隈

衡南旅情

祖詠

楚山不可極歸路但蕭條海色晴看雨江聲夜聽潮

劍畱南斗近書寄北風遙爲報空潭橘無媒贈洛橋

衡南夕望

杜甫

百丈牽江色孤舟泛日斜興來猶杖屨目斷更雲沙  
山鬼迷春竹湘娥倚暮花湖南清絕地萬古一長嗟

遊衡湘訪已公

前人

已公茅屋下可以賦新詩枕簟入林僻茶瓜畱客遲  
江蓮搖白羽天棘夢青絲空忝許詢輩難酬支遁詞

送道標上人歸南岳

劉長卿

悠悠倚孤棹却憶卧中林江草行將遠湘山往獨深  
白雲畱不住綠水去無心衡岳千峰亂禪房何處尋



石困山

前人

前山帶秋色獨住秋江晚疊嶂入雲多孤峰去人遠  
夤緣不可到蒼翠空在眼渡口問漁家桃源路深淺  
送元侍御克使南岳 皇甫曾

雲夢南衡盡三湘萬里流山川重分首徒御亦悲秋  
白簡勞王事清猿助客愁離群復多病歲晚憶滄洲

題衡岳煉師房

韓翃

春城乞食還高論此中閑僧臆階前樹禪心江上山  
疎簾看雪捲深戶映花關晚送門人去鍾聲杳靄間

題衡岳僧房

前人

披衣聞客至關鎖此時開鳴磬夕陽盡捲簾秋色來  
名香連竹逕清梵出花臺身在心無住他方到幾迴

題衡岳澹然師房

前人

雙林彼上人詩興轉相親竹裏經聲晚門前山色春  
捲簾苔點淨下第藥苗新記取無生理歸來問此身

贈衡岳隱禪師

李端

舊住衡州寺隨緣偶北來夜寒山雪下朝汲竹門開  
半偈空皆盡群生意未迴唯當與樵者杖錫入天台

送深法師遊南岳

劉禹錫

師在白雲鄉名高善法堂十方傳句偈八部會壇場



衡岳志 卷之七  
飛錫無定所寶書留舊房唯應銜菓鴈相逢至衡陽  
重至衡岳傷柳儀曹 前人

憶昨與故人湘江岸頭別我馬映林嘶君帆轉山滅  
馬嘶循故道帆滅如流電千里江籬春故人今不見  
將之衡陽道中作 張祐

萬里南方去孤舟泛自身長年無愛物深話少情人  
醉卧襟長散閑書字不真衡陽路猶遠獨與鴈爲賓  
送衡岳知興上人 賈島

久住巴興寺如今始拂衣欲臨秋水別不向故山歸  
錫掛天涯樹房開岳頂扉下看萬里曉霜海日生微

送僧還南岳

周賀

辭僧下水棚因夢岳鍾聲徑路獨歸寺幾時重到城  
風高寒木落雨絕夜堂清自說深居後隣州亦不行  
贈然上人往南岳 前人

竹逕瓶水新深稱北窓人講罷見黃葉詩成尋舊隣  
錫陰迷坐石池影露齋身苦作南行約勞生始問津  
冬夜寄衡岳僧 劉得仁

營營不自停睽濶隔年情林下期難遂人間事旋生  
鳥棲寒木迥月映積冰清石室焚香坐懸知笑爲名  
贈衡岳楚雲上人 温廷筠



松根蒲苔石盡日閉禪關有伴年年月無家處處山  
煙波五湖遠瓶履一身閑岳寺蕙蘭晚幾時幽鳥還

贈僧雲棲入衡岳

前人

麈尾與筇杖幾年離石壇梵餘林雪厚碁罷岳鍾殘  
開卷喜先悟漱瓶知早寒衡陽寺前鴈今日到長安

送衡山元遂上人

李頻

白衣遊帝鄉已得事空王却返湖山寺高吟水月房  
雨中過岳黑秋後宿舩涼迴顧秦人語他僧宿上方

南岳有感

于武陵

杜陵無厚業不得駐車輪重到曾遊處多非舊主人

東風千里樹西日一洲蘋又渡湘江水湘江水復春

送友人歸岳

杜荀鶴

家枕三湘岸門前卽釣磯漁竿壯歲別鶴髮亂時歸  
岳靜無猿叫江春有鷺飛平生書劍在莫便學忘機

尋真觀

前人

寂寂白雲門尋真不遇真祗應松上鶴便是洞中人  
藥圃花香異泉沙鹿跡新題詩留姓字他日此相親

翠巖寺

曹松

何年話尊宿瞻禮此堂中入郭非無路歸林自學空  
濺瓶雲嶠水迸磬雪川風時說南宗事知師用意同



貽南岳楚青上人

前人

在秦生楚思波浪接禪關塔礙高秋鳥窓藏白日山  
樹陰移草上岸色透林間樓內談經徹空携講疏還  
贈衡山麋明府

前人

爲縣瀟湘水門前樹配苔晚吟公籍少春醉積林開  
滌硯松香起擎茶岳影來任官當此境更莫夢天台

岳麓寺

前人

海雲山上寺每到每開襟萬木長不住細泉聽更深  
蜩沾高雨斷鳥過夕嵐沉此地良宵月長懷隔楚砧

兜率寺

裴說

一片無塵地高連夢澤南僧居跨鳥道佛影照漁潭  
朽枿雲斜映平蕪日半溼行行不得住迴首望烟嵐  
不出南岳僧

前人

四遠叅尋徧修行却不行耳邊無倍語門外是前生  
塔見移來影鍾聞過去聲一齋唯默坐應笑我營營

寄衡岳處賓上人

前人

恠得意相親高携一軸新能搜大雅句不似小乘人  
岳麓擎枯檜瀟湘吐白蘋他年遇同道爲我話風塵

寄南岳貫休

前人

憶昔與吾師山中靜論時總無方是法難得始爲詩



凍犬眠乾葉，饑禽啄病梨。他年白蓮社，猶許重相期。  
旅次衡山

前人

欲往幾經年，今來意豁然。江風長借客，岳雨不因天。  
戲鷺飛輕雪，驚鴻叫亂絃。晚秋紅藕裏，十宿寄漁船。  
贈南岳僧

方干

忘機室亦空，禪與沃州同。唯有半庭竹，能生竟日風。  
思山海月上，出定印香終。繼後傳衣者，還須立雪中。

遊南岳

張喬

入巖仙境清，行盡復重行。若得閑無事，長來寄此生。  
澗松閑易老，籠燭晚生明。一宿泉聲裏，思鄉夢不成。

寄衡岳友人

前人

相夢如相見，相思去後頻。舊時行處斷，華髮別來新。  
浪動三湘月，烟藏五嶺春。又無歸北鴈，書札寄何人。

送友人遊衡岳

前人

所投非舊知，亦似有前期。向路長江上，揚帆細雨時。  
春生南岳早，日轉大荒遲。盡採瀟湘句，重來慰所思。

李道士歸南岳

前人

千峰隔湘水，迢遞掛帆歸。掃月眠蒼壁，和雲著褐衣。  
洞虛隔潘滴，徑狹長松圍。只恐相尋日，人間舊識稀。

江上送友遊南岳

前人



何處積鄉愁天涯聚亂流岸長群岫晚湖濶片帆秋  
買酒過漁舍分燈與釣舟瀟湘見來鴈應念獨邊遊

岳館

沈雲卿

洞壑仙人館孤峰玉女臺空濛朝氣合窈窕夕陽開  
流澗含輕雨虛巖應薄雷正逢鸞與鶴歌舞出天來

送陳明府歸衡山

黃滔

野鶴兼雛下單車出柳烟三年兩殊考一日數離筵  
久別潮波綠相思岳月圓翠蘿曾隱處定恐却求仙

寄衡岳劉錄事

喻 晁

域西青島寺累夏漱寒泉今在提綱所應難掃石眠

風沙榆塞迥波浪橘洲偏重整瀟湘棹心期更幾年

岳寺秋雨有懷

前人

修修復震震黃葉此時飛隱几客吟斷鄰房僧話稀  
鷓寒栖樹定螢濕在窓微卽事瀟湘渚漁翁披草衣

送道士于千齡遊南岳

崔 塗

物外與誰期人間又別離四方多事日高岳獨游時  
猿狖瀟湘對煙波屈宋祠無因陪此去空惜鬢將衰

贈南岳去秦禪師

尚 顏

曹溪入室人終老甚難尋四十餘年內青山與白雲  
松和巢鶴看果共野猿分海外僧來說名高自小聞



居南岳懷沈彬

前人

石房閑竹徑茗外獨支頤萬木還無葉百年能幾時  
隔雲聞狄過截雨見虹垂因憶岳南客晏眠吟好詩  
寓岳送衡州薛從事

鄭巢

吟去望雙旌滄洲晚氣清遙分高岳色獨出遠蟬聲  
楚雨雲連寺湘寒浪浸城孤猿不可聽一聽白髭生  
南岳草堂讀書

僧皎然

削去僧中事南池便隱居爲憐松子壽還卜道家書  
藥院常無客茶罇獨對余有時招送吏來飯野中蔬  
招衡陽上人飯茶

前人

晦夜不可坐琴軒猶爲開牆東隱者在淇上逸僧來  
客愛梅花飲詩看卷素裁風流高此會曉景屢徘徊

送僧歸南岳

清塞

洗足北林去遠途今已分麻衣行岳色竹杖帶湘雲  
饑鼠緣危壁寒狸出壞墳前峰一聲磬此夕不同聞  
宋

寥八歸衡山

歐陽修

曾作關中客嘗窺百二疆自言秦隴水能斷楚人腸  
失意倦京國羈愁成鬢霜何如伴征鴈日日向衡陽  
和元晦

張栻



歸袂隨雲起  
籃輿趁雪明  
山僧苦留客  
世故却關情  
小倚枯藤杖  
聊聽絕澗聲  
如何山下客  
一笑已來迎

福巖寺

前人

擲鉢峰前寺  
肩輿幾度來  
樓臺還舊觀  
杉檜撫新栽  
湘水堂堂去  
秋山面面開  
徘徊千古思  
風壑有餘哀

高臺寺

前人

着屋懸崖畔  
開窓疊嶂秋  
半欹雲樹冷  
不斷石泉流  
茗椀味能永  
竹風聲更幽  
平生版庵老  
得句似湯休

自方廣過高臺

前人

兩寺清聞磬  
群峰石作城  
風生雲影亂  
猿嘯月華明

香火遠公社  
江湖鷗鳥盟  
是中俱不着  
俯仰見平生

由西嶺行後洞山路

前人

西嶺更西路  
雲嵐最窈深  
水流千澗底  
樹合四時陰  
幽絕無僧住  
閑來有客吟  
山行三十里  
鍾磬忽傳音

和元晦後洞山中晚賦

前人

石裂長藤瘦  
山圍野路深  
寒溪千古思  
喬木四時陰  
更得尋幽侶  
何妨擁鼻吟  
笑看雲出岫  
維是此無心

自西園登山

前人

雨後溪重碧  
木落山增明  
西風蕭群物  
感此秋氣清  
振衣千崖表  
俯瞰萬籟生  
匪云幽遐慕  
政尔未忘情



晨起霜晴

前人

晴嵐開岳鎮雲雨斷陽臺日出寒光迥川平秀色回  
興隨天際鴈詩寄嶺頭梅盛事它年說憑君記一杯  
用元晦定王臺韻

前人

珍重南山路驅羸幾度來未登喬岳嶺空說妙高臺  
曉霧層層歛竒峰面面開山間元自樂澤畔不須哀  
和擇之看雪

前人

岳背三冬雪真同不夜城野雲何晃蕩澗水助空明  
行橐多新句青山有舊盟堂堂身世事渠謾說三生  
贈上封諸老

朱熹

夜宿上封寺翛然塵慮清月明殘雪裏泉溜隔窓聲  
猶衲今如許綈袍那復情爐紅虛室暖聊得話平生

祝融峰

前人

今年緣底事浪走太無端直以心期遠非貪眼界寬  
雲山於此盡風袂不勝寒孤鳥知人意茫茫去不還

十五日再登

前人

江流圍玉界天影抱瓊臺柱杖烟霄外中崑日月回  
箕山藏遁許吳市隱僊梅一笑今何在相期再舉杯  
與友同登舉酒極談

前人

我已中峰住君從何處來莫留崑底寺徑上月邊臺



濁酒團樂坐高談次第開前賢渺安在清醑寄餘哀

晨起霜晴

前人

比者無新夢南山有舊臺端能成獨往未肯遽空回  
磴滑新經雪林深不見梅急須乘霽色何必散銀杯

祝融峰

佛印禪師

秋風吹拄杖直到祝融巔日極三千界肩摩尺五天  
扶桑暘谷畔青草洞庭邊雲氣無遮障分明在眼前

合江亭

文天祥

天上名鷄尾人間說虎頭春風千萬岫合水兩三洲  
客晚驚黃葉官閒咲白鷗雙江日東下我欲賦扁舟

湘江留別

前人

瀟湘一夜雨江海十年雲相見皆成老重逢便作分  
啼鵲春浩蕩回鴈曉殷勤江濶人方健月明思對君

國朝

謁朱張二賢祠

駱堯知

夙駕初登岳從師几杖新江山開地軸溪瀟聽天鈞  
採藥雲迷路拔林月在身哲人應識我不是浪遊人

與衡邑令留別

張治

瀟洒衡山尹公然道氣偏相逢人似玉惜別酒如泉  
秋水雷家市江風烏石船集賢如可卜須共買山田



遊靜谷

戴加猷

宦况仍清冷幽尋入此中  
泉飛晴日雨花落暮春風  
猿鶴情悰雅芝蘭臭味同  
岳雲送歸目遙到富春東

遊岳麓

前人

不作南遷客何因到此堂  
心虛天共遠意足月俱涼  
物色經秋澹江聲入夜長  
曲肱聊假寐彷彿見朱張

雨霽登岳

前人

過雨山如沐看山及此時  
合林通徑小斷靄露峰奇  
遠覽防心障高登覺地危  
遊觀存警策此意達人知

又

前人

天霽翬飛閣衣冠壯此遊  
林雲晴作雨巒氣夏成秋  
鳥並松岡語泉分藥圃流  
箇中饒逸興峰頂瑞光浮

石鼓書院

朱維京

未討金科蹟先探石鼓文  
千峰杯外落二水檻前分  
古碣餘秦篆荒臺滯楚雲  
西窻青一帶岳色遠氤氳

盤石庵

張勉學

名山饒勝地盤石是吾廬  
一壑春常滿三生願已餘  
松雲侵榻冷蘿月度窓  
虛暇口頻過此焚香味道書

雞公庵

陳能

山深雲作雨石淺水生花  
琪樹欺霜霰禪僧閱歲華



浪遊多過客幽隱是誰家擬約浮丘伯同來咽紫霞

南臺有懷

鄒善

閒聽山僧話群仙天與徒有時參石髓竟日坐松樞  
抱一一何有觀空空亦無自憐櫻世網高目睨方壺

坐兜率石上

前人

別有一乾坤雨餘竹樹繁蕭疎塵慮息寂寞道心存  
危閣欹凌漢幽溪曲抱源暝來盤石上跌坐竟忘言

鴈峰

許宗魯

翠巘穿雲上青山回鴈峰江流分楚越風日間秋冬  
野望隨天盡鄉心對酒濃雲霄羨陽鳥無翼爾相從

又

前人

近廓山林僻浮空竹樹開瀟湘滌素練雲物護丹臺  
歲晚群芳歇天長旅鴈回遠遊思擬賦真愧屈平才

觀音巖

邊維垣

日晚共登臺浮雲萬里開鴈聲天外落蟾影海邊來  
玉露團秋草銀河入酒杯相看幽意愜不必問蓬萊

衡岳僧

蔡潮

南臺無碍叟茹草幾年餘心靜寒灰似形雁野鶴如  
佛龕燈再續塵世跡應踈萬象芙蓉裏鍾更禮梵書

半山亭

范永鑾



小坐方亭靜雲深景自幽捲簾飛紫蓋俯几看湘流  
路接三千界峰迴八百洲祝融容易到望遠興還稠

前題

董策

石磴羊腸險雲門鳥道縣半山還翠蓋萬壑響清泉  
爲聽高僧偈應憐對月眠還期登絕頂不負探幽玄

祝融峰

陳鳳梧

靈龜一片石千古是飛來縹緲臨風壑蒼茫試劔臺  
中天紅日起遠岫碧雲開四顧無人跡惟聞猿嘯哀

上封寺

胡直

紫蓋接芙蓉層巒歷上封穿雲迷後侶失路聽前鍾

世界歸天眼烟霞入性宗莫矜凌絕頂猶有最高峰

其二

前人

客有冷然興隨子躡紫烟狂歌希散聖宴坐見諸天  
臥榻依南斗齋厨注細泉但同無愛染那用禮金僊

李鄴侯隱居

尹臺

舊宅迷黃葉荒基指碧岑高賢不可見流水暮烟深  
石折懸蛇逕雲霾伏虎林相唐垂大業往迹嘆而今

住方廣

羅洪先

坐石忽忘去買山無後期不憐生是寄翻以愛爲悲  
門憶曾題處松看初長時千年風與月來者自棲遲



訪方廣大方靜室

前人

一徑遠微微深林自掩扉結茅隣虎穴積葉臥牛衣  
苦藥朝存食寒藤夜獨歸無心答問語誰辯萬緣非

上封

羅洪先

絕地敞龍宮千峰擁祝融烟雲遙泛海樓閣盡懸空  
檻俯湘中樹窓來天際鴻不須談棄屐雙鳥正乘風

祝融絕頂石

前人

雲路轉高寒秋空入大觀石從銀漢取樹傍白榆看  
忘語天休問齋心露可餐不因遊象外那解出塵難

穿雲入方廣

前人

雲裏度遙岑臨虛逕轉深石迷多伏虎樹隱獨聞禽  
乍識爲霖意誰明出岫心鴻蒙如解語吾欲寄瑤音

出方廣

前人

齋心踰一七經義破三千黃葉石間路青松山下泉  
客遊朝復暮禪定日如年回首鍾鳴處深林隔四天

前題

高簡

石廩迎天柱金蓮湧地維招提秘邃壑賢哲洽襟期  
日月迴鳴澗乾坤付奕棋誰餐金光草長此寄鷓枝

前題

歐陽繼

信宿番方廣秋容別市城高風寒葉墮新月夜堂明



蟲韻偏依石螢飛却近楹與僧談夢幻真覺愧浮名  
南臺  
謝邦信

共說南臺勝班荆得賞音倚闌星宿近下榻白雲深  
碧篠環山玉黃精布地金水簾風動夜病骨覺寒侵  
次念菴太史韻  
陳慶

登山殊不厭祗恐負幽期一入諸天寂能忘萬劫悲  
澗深龍臥處松老鶴來時竊憶朱張會因憐躡履遲  
結亭兜率庵後宴坐有懷  
盧星野

名岳應星躔幽溪隱法筵高人來結屋野客坐聽泉  
翠竹今誰主丹巖夙有緣盧敖天外去暫借幾回眠

南臺

常守成

峰下南臺寺秋霄借榻眠星河垂近牖鐘磬下遙天  
紫殿猶傳古丹丘可問僊夢遊何處所疑到白雲邊

方廣謁二賢祠

劉穩

向來懷板屋今日慰心期賴有斯文在能無絕學悲  
雲山迢遞路風雪唱酬時此意憑誰會悠悠歸去遲  
其二  
前人

清晨度翠微傍晚扣禪扉月上蓮花頂雲侵薜荔衣  
古祠芳草合高樹暮禽歸爲憶經行處紛然岐路非  
南臺  
何止



山頭初歇雨，趁暖過南臺。僧老青松外，泉鳴翠壁隈。  
苦心尋石煉，薄分愧雲開。虛閣沉吟罷，登峰客又催。  
暮投方廣寺

張居正

白雲處處滿，行子暮何栖。不辨幽林色，惟聞歸鳥啼。  
虛巘映靈籟，人語隔前溪。夜宿莊嚴境，明珠照客迷。  
訪大方禪僧

前人

煙雨曉微微，山僧未啓扉。花壇分石髓，苔壁掛牛衣。  
揮塵頻聞難，停杯已忘歸。曹溪一宿後，真覺夙心非。  
方廣燕坐

前人

幽懷何所託，長與薜蘿期。聽法過秣苑，皈心禮大悲。  
壑晴雲起處，松暝鶴歸時。此意人先覺，吾來已較遲。

遊南岳

王京

振衣南岳寺，幽絕景偏多。石几堆紅葉，禪床近碧蘿。  
憑虛宜遠眺，適興自高歌。極目秋空澹，悠然一鳥過。  
超然亭

呂希周

綉壁懸千丈，超然見此亭。江燈山外起，鉄笛坐中聽。  
醉眼憐行屐，高歌倚石屏。飄飄忘去住，明月且須停。  
登祝融峰

林茂桂

赤帝乘離位，中峰最上頭。振衣南斗近，縱目紫冥收。  
彷彿迎朱鳥，憑陵跨玉虬。長風如可馭，四岳任遨遊。



峰頂雪樹

前人

積雪逢新霽峰高群玉寒千巖懸石乳萬樹簇琅玕  
枝厭白龍舞條垂素鳳蟠瓊膏堪澤骨采和碧霞餐

望岳

劉堯誨 臨武人

曾愛頭陀記秋風此日身夢回蒼水使書絕魏夫人  
白石山中飢黃芽世外春金門須大隱歸志豈思尊

宿上封寺

前人

祝融望不極百道飛靈泉海日流珠急天風孤嶼懸  
神開金簡秘僧飽石根眠莫怪耽空寂功成別有緣

宿南臺寺

前人

南州啓淨土歷劫到雲岑色界三千幻祇園雙樹深  
軒開虛受月禪定靜鳴禽未了西來意難安去住心

朱陵洞

前人

慣熟山前路行吟人不疑礪迴青障合雲湧碧簾垂  
石髓浮春酌金光動曉曦玄虛不可覓欹枕問希夷

二賢祠

前人

昔賢勤仰止風雪此山堂秘迹窮玄覽微吟入混茫  
燈傳千聖慧鉢洗九溪芳已矣吾何適祠前秋草長

九鶴觀址

曾朝節 臨武人

翩翩九羽客騰躍在珠庭福地空殘礎仙踪只落星



燒丹應秘術鍊氣總遺形  
雅尚紅塵外誰傳相鶴經  
觀日

伍讓郡人

策杖臨丹巘捫參出半空  
露凝仙掌白霞泛海門紅  
秋色三山外陽輝萬島中  
應須擎紫蓋飛向若華東  
岳遊卽事

前人

褰帷看岳色上下歷山原  
曲磴穿雲竇清泉漱石根  
梵宮塵不到虛壑霧相吞  
况有煙霞客幽期可共論  
宿方廣

前人

良夜同僧話燈明古佛前  
雙林濯露冷一榻和雲眠  
真境原無礙塵勞徒自牽  
欲知清淨理看取碧山蓮

天聖巖

前人

策杖凌丹巘穿雲度石橋  
危樓懸樹杪曲磴倚霞標  
返照明金像輕風引玉簫  
忽聞中夜雨一洗俗塵消

宿天聖閣

前人

高閣倚巖邊松林宿暝煙  
星河搖戶牖夜雨滴秋泉  
覺夢元非俗清虛似欲仙  
曉來鍾磬發稽首世尊前  
登申仙人石室

前人

石室縱層霄雲山入望遙  
丹成雙鶴下道大百靈朝  
秋老巖前桂風傳天外簫  
探竒欲未已明月坐相邀  
送念都道人入南岳

前人



衡岳七十二處處足煙霞採藥經何地眠雲卽是家  
朝看滄海日暮倚玉壇花待得丹成後安期棗似瓜  
贈了空上人  
前人

閒情同野鶴遠意任煙霞挂錫依湘浦經行轉法華  
山空青倚戶地僻鳥啼花一榻安禪久南宗路豈賒  
贈九龍盆僧  
前人

選勝靈巘側幽棲不記年齋心依淨域清磬發諸天  
寶地花盈砌香厨竹引泉觀空塵不染應悟石頭禪  
登南臺訪舊僧聽琴有感  
王之屏 郡人

偶停塵外策忽聽隔窻琴在世能超劫移檄解証心  
餘生歸鹿苑大道隱珠林鏗尔高臺上躊躇戀夕陰  
登南臺次父韻  
何道求 郡人

福巖攀蹬倦晚憩向南臺輿轉盤松徑雲生煨芋隈  
尋吟賡舊韻望霽喜今開餐畢分僧榻夢殘曉磬催  
再宿上封  
劉際炎 臨武人

炎歊舒爽氣徙倚白雲封飛蓋追玄鶴凌煙架赤龍  
祝融瞻帝極蒼水仰朝宗億劫神霄外光天拜舞重  
訪獅子巖無礙遺踪  
前人

扶筇凌絕巘訪古迹蒼然啖菜披蘿月誅茅斷壑煙  
臺層雙礎潤貌古一燈傳深夜來清梵潮音近九天



遊岳訪三際瑞光兩上人

劉亨甲臨武人

木落看山色泉飛作雨聲嶺危修徑窄秋爽曉霜清  
爲訪遠公社來尋讓祖盟相期了俗障從此結三生

秋夜宿兜率寺

趙良相郡人

萬岫含烟暝于中別有天磬隨清梵遠岩傍慧燈懸  
月挂臺心鏡雲流石底泉坐來塵慮淨不寢欲安禪

又

前人

捫蘿躋峻坂倚杖憇人天籟淨松風度雲孤海月懸  
踈樵空大地欹枕漱飛泉况有尋真侶聯床可證禪

望五峰

前人

五峰春欲暮閒步訪僧房隔水踈鐘度凝眸爽氣長  
松花飛淨土樹影射斜陽自是昆盧境悠悠歲月忘

坐講經臺

鄺祖詩臨武人

林深習靜所臺畔倚烟霞野鶴頻來往山僧共結伽  
風前翻貝葉會上散天花消却紅塵慮皈依禮法華

登衡岳絕頂

前人

山勢吞吳楚峰高萬籟殊秋深天柱老夜半月巖孤  
雲色兼霞淨泉聲帶雨粗箇中清冷趣自是小寰區

望衡岳

柯文

行盡衡湘路方知南岳尊衆山皆地伏一柱入天門



辰極遙分位炎荒近吐吞無由起瀦霍一訪此靈根  
遊岳 劉經筵

衡岳千峰赴峻嶒勢倍雄天遙秋落鴈石峻書飛虹  
赤殿明初日蒼松度晚風徘徊饒逸興杖履勝青驄

望岳

改稿

徐汝霖

岳望高無際危亭入半雲路疑千嶂合天若一山分  
谷響樵傳語峰斜日欲曛登臨如有待徒倚對炎君

贈衡山令

裴說

君吟十二載辛苦必能官造化犹難隱生靈豈易謾  
猿眺高岳靜魚擺大江寬與我爲同道相留夜話闌

訪衡山廖凝山居

李建勳

郢地相尋夜荒山雪灑篙虛堂看向曙吟坐共忘勞  
溪凍聲全減燈寒焰不高他人莫相笑未易會吾曹

遊羅浮有懷南岳

仙傳云羅浮爲南岳前洞

鄧雲霄

地脉通南岳仙源迥不分振衣臨倒景揮手弄飛雲  
望望朱陵氣霏霏赤玉文願騎五色鳥遠訪祝融君

登南臺

張大訓

孤吟天霽閣竚想昔賢蹤塵靜山中寺雲開戶外峰  
清泉分石視白鳥臥高松林薄聞人語真仙或可逢

雨阻不得登岳

李遷



白雨隨車至天應薄漫遊孰知千里興翻爲片雲留  
樹色侵衣濕山光隔幔流無因借颺吹飄忽暝烟收

圓寧僧房

邊維垣

一僧幽卧處但見白雲深采藥尔何去扶筇我獨臨  
寒花連竹逕秋水照松陰眼界俱無染因之生道心

遊兜率菴

張守約

名山多勝槩幽谷最奇觀樹色千林曉泉聲六月寒  
仙橋通古剎松徑隱經壇修竹池亭上流觴憶懶殘

集賢書院留別

蔡潮

斯文聯一脉骨肉豈虛言聊以官行教終難法勝恩

吐懷應信我語別欲銷魂夾道牽帷問前途許及門

南臺寺

丁致祥

借榻南臺寺西巖落日初聖燈遙破暝高閣迴憑虛  
佛供籠林果僧厨饌野蔬開窓山月白照見壁頭書

南臺寺

易舒誥

懸崖千尺閣時眺抄秋初直上最高處恍然聞步虛  
燭流經宿火盤出未嘗蔬此是清涼境宜藏貝葉書

新秋登迴鴈峰

鄧雲霄

城郭晚蒼蒼蟬聲送早涼薄遊同逐客作賦擬哀湘  
鄉信南來斷江流北去長高峰爾何意不遣鴈隨陽



暮投方廣寺

張居正

白雲處處滿行子暮何栖不辨幽林色惟聞歸鳥啼  
虛巖映靈籟人語隔前溪夜宿莊嚴境明珠照客迷  
方廣燕坐次念菴韻

前人

幽心何所託長與薜蘿期聽法過祇苑皈心禮大悲  
壑晴雲起處松暝鶴歸時此意人先覺吾來已較遲

湘江舟中望南岳

鄧雲霄

仙峰七十二紫蓋氣偏驕縹緲如飛去昂藏獨不朝  
聽殘湘女瑟腸斷翠鸞簫何日憑雲宿金丹浴月瓢

過半山亭

管大勳

始向平厓立蒼茫氣色分勝遊偏霽雪靈睭自開雲  
迴鴈遙空度鳴泉絕壑聞此中堪大隱猿鶴即為群

再訂石鼓之約

沈鈇

白社聯星聚青尊傍夜開雲隨湘水去春逐講堂回  
把袂原同調論心更舉盃匣中龍劍合需爾共登臺

洗衲池

李燾

寶地山環碧珠林瀑獻奇一泓開宿海三峽到天池  
丹鼎銀為冶龍頭雪作髭從來堪洗衲即此濯纓宜

方廣龍潭

劉廷福 郡人

山寺龍神穴相傳幾百年聽經隨八部護法擁諸天



岸繞金沙細池開玉鏡圓明珠人不見夜照佛筵前

大坪寺

劉宦 郡人

香閣千盤上丹梯一徑懸洞門和霧入石室與天連

貝葉開龍藏瓊花布法筵茲山實靈異吾欲學參禪

玉清洞

劉官 郡人

開士何年至尋雲鑿洞房鳥依懸塵壁藤蔓閉關床

古塔明珠伏陰崖石鏡光上方隨意去處處有天香

陪楊止菴年兄登祝融

歐希稷 郡人

杖策隨仙侶穿雲到上封浮空晴色澹出岫暮烟濃

浩劫三生話心知一笑逢憑欄看下界青翠削芙蓉

登南臺夜聽林籟

王之屏 郡人

大竅原吹萬淒清併入林風簾參玉笛月幌映孤琴

谷靜疑玄牝禽來亦敲音聲味都忘後瀟然敞素襟

登衡岳

鄺祖禹 臨武人

翠靄南山麓層巒似畫圖飛泉晴亦雨吐霧密還孤

五色時光現中天半有無何須覓海上此地即蓬壺

坐講經臺

黃華勳 柳陽人

結構成精舍支撐傍斗台迷津憑筏渡覺路借繩開

護法龍歸鉢聞經鳥集臺月明諸品淨何處惹纖埃

望日臺

袁伯璣 柳陽人



混沌何年闢蓬壺此地幽客因觀日到仙欲御風遊  
採藥雲生屐捫蘿霧溼裘吾將解世網隨分老丹丘  
宿上峯  
前人

竹杖來方廣繩牀宿上封高低黃葉路隱見白雲峰  
月度歸林錫風吟隔寺鐘登時塵想寂箕踞坐長松  
衡岳禪詠  
張文光

深祕朱陵洞高危紫蓋峯綠肥千歲竹碧長萬年松  
隱隱藏靈恠時時現虎龍鴈鴻飛不過綿亘白雲封

五言絕句

唐

寄南岳客乞靈蕪香

陸龜蒙

聞說融峰下靈香似反魂春來正開采試爲斲雲根

賦南岳廟

袁氏少年

峰巒多秀色松桂足清聲自有山林趣全忘城闕情

半山亭

朱景玄

中峰上翠微牕曉早霞飛幾引登山屐春風踏雪歸

白龜泉

皇甫渙

靈臺塵不止塵止非靈臺愛此一泓水曾植靈物來



題金牛石壁

無名氏

手持黃鶴來脚踏金牛背塵世無人知白雲久相待

宋

衡山書樓

朱熹

君家一編書不自圯上得石室寄林端時來玩幽蹟

雲峰寺

盧肇

翔風振林壑樓臺虛無間半夜雲開月流水滿空山

題岳麓

趙抃

雨久藏春蠹風高老屋斜隣居盡金碧一一梵王家

拜岳石

前人

片石倚中天雲深鳥道間人多祝堯壽登此拜南山

國朝

開雲樓

尹臺

熙陽布麗景宿雨散層陰因嘆開雲日悠然思古今

岳山雜味

管大勳

丹沙揚金光夕晦如秉燭共道聖燈來明星朗相續

又

前人

飛泉噴若雷白日劈青嶂舉頭看玉龍倒掛層崖上

又

前人

執役收殮餘啖芋出糞火度世有高僧色相不在我



將發方廣

李燾

蕭散出塵網來爲廿日遊誰知山寺裡別自有滄洲

自方廣還衡陽舊署

前人

夢輒戀青蓮衣猶染紫烟兒童驚兩鬢蒼素復添玄

七言古風

唐

送陳郎將歸衡

李白

衡山蒼蒼入紫冥下看南極老人星迴飈吹散五峰  
雪往往飛花落洞庭氣清岳秀有如此郎將一家拖  
金紫門前食客亂浮雲世人皆比孟嘗君江上送行  
無白壁臨岐惆悵若爲分

朱鳳行

杜甫

君不見瀟湘之山衡山高山巔朱鳳聲嗷嗷側身長  
顧求其曹翅垂口噤心甚勞下愍百鳥在羅網黃雀



最小猶難逝願分竹實及螻蟻盡使鷓鴣相怒號

祝融般若禪師

劉長卿

般若公般若公負鉢何時下祝融歸路却看飛鳥外  
禪房空掩白雲中桂花寥寥間自落流水無心西復  
東

寄南岳靈徹上人

劉禹錫

釋子道成神氣閑住持會上清涼山晴空禮拜見真  
像金毛玉髻卿雲間西遊長安隸僧籍本寺門前曲  
江碧松間白月照寶書竹下香泉洒瑤席前時學得  
經綸成奔馳象馬開禪局高筵談柄一麾拂講下門

徒如醉醒舊聞南方多禪老次第來入金門道荊州  
本自重諸天南朝塔廟猶依然宴坐東陽枯樹下經  
行居止故臺邊忽憶遺民社中客爲我衡陽駐飛錫  
講罷同尋相鶴經閑來共獵登山屐一旦揚眉望沃  
州自言王謝許同遊憑將雜擬三十首寄與江南湯  
慧休

祝融峰

韓愈

祝融萬丈拔地起欲見不見輕烟裏山翁愛山不肯  
歸愛山醉眠山根底山童尋着不敢驚沈吟爲怕山  
翁嗔夢回抖擻下山去一逕蘿月松風清



岫嶁峰

前人

岫嶁山尖神禹碑字青石赤形模奇科斗拳身薤葉  
披鸞飄鳳泊舞蛟螭事嚴跡秘鬼莫窺道人獨上偶  
見之我來咨嗟涕連沍千搜萬索何處有森森綠樹  
猿猱悲

謁南岳廟遂宿岳寺題門樓 前人

五岳祭秩皆三公四方環鎮嵩當中火維地荒足妖  
恠天假神柄專其雄噴雲泄霧藏半腹雖有絕頂誰  
能窮我來正值秋雨節陰氣晦昧無清風潛心默禱  
若有應豈非正直能感通須臾靜掃衆峰出仰見突

兀撐青空紫蓋連延接天柱石廩騰擲堆祝融森然  
魄動下馬拜松栢一徑趨靈空粉墻丹桂動光彩鬼  
物圖畫填丹紅升階偃僂荐脯酒欲以菲薄明其衷  
廟令老人識神意睢盱偵伺能鞠躬手持環玦道我  
擲云此最吉爲難同竄逐蠻荒幸不死衣食纔足甘  
長終王侯將相望久絕神縱欲福難爲功夜投佛寺  
上高閣星月掩映雲腫朧猿鳴鍾動不知曙杲杲寒  
日生於東

岳麓寺

沈傳師

承明年老輒自論乞得湘守東南奔爲聞楚國富山



水青嶂遞迤僧家園含香珥筆皆眷舊謙挹自忘臺  
省尊不令執簡候亭館直許携手遊山樊忽驚列岫  
晚來通朔雪洗盡烟嵐昏碧波迴嶼三山轉丹檻繚  
郭千艘屯華鑣蹀躞狗砂步大旆綵錯輝松門樛枝  
競鶩龍蛇勢折幹不滅風霆痕相重古照倚巖腹別  
引新徑縈雲根目傷平楚虞帝魂情多思遠聊開罇  
危絃細管逐歌颺畫鼓繡靴隨節翻鏘金七言凌老  
杜入木八法蟠高軒嗟余潦倒久不利恐復感激論  
元元

國朝

送何生鴻遊岳

湛若水

吾聞衡岳有五峰十年磊落吾胸中去春春風送我  
游梯上雲雨迷行踪迴車神遊十一拍拍拍縹緲鞭  
蒼龍何生何生仙骨何神通先我飛錫駐祝融祝融  
君湏我問訊朱明小憇待秋風何生毛骨本仙侶許  
執几杖還相從許執几杖還相從吾將拉子游無窮

仰南岳

李慶陽

我所仰兮在衡山側身南望阻荆關祝融岩亭心悲  
酸仙人贈我赤瓊丹婆婆娑桂樹山之間我欲從之途  
路難南望洞庭涕潸潸



望月臺

孫應鰲

望月臺古雲霧棲靈圖秀發祝融西人間朗晷已落  
盡此地清光猶未低我聞佳境特疑眺霧散雲開歛  
幽妙虛明夜色蕩初晴錯落霽華浮曉照曉照亭亭  
月漸中南山桂發映寒叢碧流水壑陰平布素展星  
河影乍空春風微微琪草茁縹緲湘靈來鼓瑟望而  
不見起長嘆欲賦青峰轉愁失浮杯几席洞庭涯海  
外三山不可期坐惜凋年憐急景惟應明月最相知

南岳

何孟春

衡山兀立炎州宗主峰萬丈名祝融朝廷往往降香

幣廟貌翼翼何尊崇時朝重華駕朱鳥蒲山松檜吹  
迴風名儒流落何曾郵開情特迂昌黎翁文公來時  
方冰雪將返星宿羅長空顯示生前值昏翳身後此  
道明無窮我魯帝傍製雲錦機杼斗柄梭飛龍勅携  
花樣賁下土手法不與人間同自憐水陸困奔走誰  
似海岳能包容此行參謁望靈庇早晚羈縲歸山中  
薄雲不雨有深意退路坦坦無災凶乾坤文繡自珍  
襲吐氣五色成長虹稔聞神仙蒸絳闕久缺樂府聲  
蒼穹步虛數闕焚案上新響傳通鈞天宮

禹碑歌

楊慎



神禹碑在岫巖尖祝融之峰凌朱炎龍書傍分結構  
古螺書匾刻戈鋒銛萬八千丈不可上仙扃鬼閉幽  
以潛昌黎南遷曾一過紛披芙蓉寨水簾天柱夜瞰  
星斗下雪堂朝見陽輝暹追尋夏載赤石峻封埋古  
刻蒼苔黏拳科倒薤形已近鸞漂鳳泊辭何織墨水  
流傳世應罕青字名狀人空瞻永叔明誠兩好事集  
古金石窮該兼昭列箴銘暨欵識橫陳駢駢和全齋  
胡爲至寶反棄置捃捃磨蟻損鳥蟾又聞朱張遊岳  
麓霽雪天風影佩膽搜竒索秘跡欲徧春偈懂和詩  
無厭七日崎嶇信有覲一字膏馥寧忘拈非關喘嶮

阻登陟定是藤葛籠窺覘好古予生嗟大晚拜嘉君  
貺情深快老眼增明若發覆尺喙禁斷如施箝七十  
七字挈螭虎三千餘歲叢蛇蚪憶昔乾坤漏息壤蕩  
析蒸庶依苓椽帝嗟懷襄咨文命卿佐洛洞分憂惓  
洲并渚混沒營窟鳥逆獸遠交門簷揭來南雲又北  
夢直磬西被仍東漸黃熊三足變絃服白狐九尾歌  
龐裊後乘包湖按玉牒前列溫洛呈疇隴永奔窠舞  
那辭牝平成天地猶垂謙華岳泰衡祇鎮定鬱塞昏  
徒逝喁噉文章絢爛懸日月風雷呵護環屏黔君不  
見周原石鼓半已泐秦湫詛楚全皆藏此碑雖存豈



易得障有嵐靄峰堪巖足音迥絕柱黎藿弔影颺瑟  
森櫺柵湘娥遺珮冷斑竹山鬼結旗零翠筵造物精  
英忌泄露祇恐羽化難留淹欲摹古本鐫巖壁要使  
好事傳細縑著書重訂琳琅譜裝帖新耀瓊瑤籤麝  
煤輕翰蟬翅榻煩君再寄西飛鸚

南岳山歌

管大勳

祝融高高不可上出地九千七百丈層巒羅列挿丹  
丘千里崢嶸排青嶂西起岷峨接滇貴東走江越連  
吳會南條之山誰最尊俯臨五嶺控八桂沅湘流夾  
迤邐來下注七澤洞庭開華恒嵩岱焉足擬雄都作

鎮真崔嵬自從黃帝分疆域虞舜南巡遵岳麓岫嶺  
禹蹟揭穹碑祀典靈祠代修復朱鳥翩翩集崆峒南  
極閃閃燭長空巨靈轟轟通碧落群仙裊裊會飛虹  
千盤萬疊如伏虎聳如龍翔與鳳舞紫蓋香爐不可  
攀靈禽石困流傳古上有青玉壇下有珊瑚芝封嵐  
夕暝鬱不散晶光搖映天風吹君不見峻極亭火雲  
崑崙列星峰頭丹竈閉積雪盤古神仙今誰靈又  
不見朱陵洞珠簾千尺掛飛竦中有幽人醉石眠醒  
時閑把清泉弄我來登山興悠哉雲披雨霽無纖埃  
虛明到處藏僊窟翛然欲跨青鸞回俯仰乾坤同一



息兀立中峰看秋色氣吞五岳欲凌風何似神遊遍  
八極

謁衡岳次韓昌黎韻

岳和聲

岳雲默禱開文公突劃鴻濛界天中靈氣高寒矗萬  
古斯人傲兀與之雄九向九背七百里崎嶇截業窮  
無窮竭來支筇望冥宿嶽薛兩腋凌罡風茫茫九域  
挺八柱旁礴孤撐帝座通上割昏曉搏日月俯散崕  
嶠點青空遠浸洞庭插倒影蒸湘濱沅澹冲融千峰  
刻露嵌幽崖往往光怪逗神宮拖藍挹翠碧于染暈  
飛翼翼間殷紅春雨連旬悵泥阻采蘋一薦愁予衷

千載韓劉與柳子甲夜恍惚歡逢躬把臂爲問岐中  
岐百年碁局將無同浮雲幻變歷今古了者應知洞  
始終五丁移石澗自勞精衛填海難爲功相期特上  
望日峰夜半扶桑躍朦朧黃茅青雨龍水客家在衡  
陽東復東

大觀樓歌

壬子仲春落成携  
邵邑諸公同登賦

鄧雲霄

縱橫千里日浩蕩萬古心乾坤何寥廓山水自高深  
樓頭縹緲諸天近玲瓏八面祥飈引誰言新成來賀  
燕祗恐孤鶩如結蜃披襟臨水攬蒸湘揮手憑空捫  
翼軫遊絲搖曳扇微和城郭郊廛樂事多正看晴景



浮烟樹又送春聲入棹歌棹歌殘漁歌起紫蘭落遠  
洲斑竹垂清泚白雲片片自南來借問蒼梧何處是  
微茫七澤盤心曾凭欄一嘯生雄風我欲挾赤帝鞭  
赤龍劃長空而倚劍蹴天山而掛弓平生慷慨羞懷  
土去國懶栽王粲賦平生散漫恣豪狂興來還踞庾  
公床世上人空老壺中日自長爭名與爭利臧穀俱  
亡羊君看醯鷄不出甕亦有鵬背摩青蒼誰是誰非  
園吏夢無憂無喜麴生鄉我爲登樓歌高聲振林木  
曾聞芥子納須彌肯道吾身同一粟慕天席地無邊  
幅倦來且抱希夷宿

七言排律

唐

岳麓道林二寺

杜甫

玉泉之南麓山殊道林林壑爭盤紆寺門高開洞庭  
野殿脚插入赤沙湖五月寒風冷佛骨六時天樂朝  
香爐地靈步步雪山草僧寶人人滄海珠塔剎宮墻  
壯麗敵香厨松道清淨俱蓮花交響共命鳥金榜雙  
迴三足鳥方丈涉海費時節玄圃尋沙知有無暮年  
且喜經行近春日兼蒙暄暖扶颺然斑白身奚適傍  
此煙霞茅可誅桃源人家易制度橘州田土仍膏腴



潭府邑中甚淳古太守庭內不喧呼昔遭衰世皆晦  
迹今幸樂土養微軀依止老宿亦未晚富貴功名焉  
足圖久爲野客尋出慣細學何顯逸興孤一重一掩  
吾肺腑山鳥山花吾友于宋公放逐曾題壁物色分  
留與老夫

道林寺

常 籍

石門迥接蒼梧野愁色陰深二妃寡廣殿崔嵬萬壑  
間長廊詰曲千巖下靜聽林飛念佛鳥細看壁畫馱  
經馬暖日斜明啼竦梁濕烟散羃鴛鴦瓦北方部落  
檀香塑西國文書貝葉寫壞欄迸竹醉好題窄路垂

藤困堪把沈裴筆力鬪雄壯宋杜詞源兩風雅他方  
居士來施齋彼岸上人投結夏悲我未離擾擾徒勸  
我休學悠悠者何時得與劉遺民同入東林遠公社  
宋

祝融峰

黃庭堅

萬丈祝融插紫霄路當窮處駕僊橋上觀碧落星辰  
近下視紅塵世界遙螺簇山低青靄靄線拖水遠綠  
迢迢當門老檜枝難長絕頂寒松葉不凋纔到秋初  
霜已降每逢春盡雪方消偃巖老衲針常把度夏禪  
僧扇懶搖龍向池邊施雨澤鳥於窓外奏簫韶遊人



未必常居此暫借禪房宿一宵

卷之七終





